

TITINE


(A l' après dè "Trifouyaedjes dèl morâlè" do Dîvin Mârkeu d' Sâde)

(2)

Yèyète k' èstéve sûre di divnu ène "grande Madame" avéve don lèyî la s' sou k' avéve, à sès ouy, dè trop strwètès idèyes d' vièrtu èt d' bons sintumints. Li ptite è nd' ala po voye l' costri ki, dins lès timps nèn co lon èri, n' avéve mauy manké d' lî carèssî si djintimint s' massale à chake côp k' èle s' avîne rèscontré èmon s' momam.

Èt Titine d's'î ritrové tote bièsse èt mërseûle dsus l' sou.. L' feume lî avéve d'on lan r'clapé l' uch au mouzon tot lî bwêrlant : "Pinsèz k' avou cki vosse mam mi duvéve co dj'a d' kwè m' occuper dè bribeuses ?"

L' pauve djonne orfuline tûza adon au bon vî curé dèl paroche. Li, po l' mwins, ki n' avéve mauy stî l' dêrin à profiter - pou sès bounès ouves, parèt-i - dè laurdjèsses di s' pauve moman, ki l' Bon Diè l' rascoude è s' Paradis, aléve lî doner dè bons consêy ! L' pansau abé a comincî pa lî



èspliker k' i sès abondrwètès èstfîne dèdja bèn d' pau po lî pèrmète di viker à s' n' auje po d' co sayî d' ètèrtinu dè djins sins réns. Adonpwîs, radjustant sès rondès bèrikes dsus s' rodjasse néz po l' mia riwêti, il î a dit : "Choûtoz-m ' , on s' poréve arindjî : vos porîz tinu m' mwinnædje. Dji m' va vos fé mète ène payasse di sètch foûr au gurnî èt vos aroz èto d' kwè mougni." Ck' avéve chûvu n' a wêre plaît à Titine : di s' blanke mwin l' sint ome lî avéve rlèvé l' minton èt lî claper dsus sès lèbes one èwisse énslante bôje nèn fwârt catolike.

Titine s'a rissatchî è n' èri èt dîre : "Mossieu, dji n' seu nèn vineuwe po briber ocobén po divnu mèskène. Dj' atindéve di vos lès consêy èt l' côp d' mwin ki dji pinséve awè drwèt sins duvu lès bassemint payî !" L' abé s' avéve mwèji èt l' bauchèle di s' voye sètchmint mèteuwe à l' uch po l' trwèzyinme côp dsus l' minme djoûrnêye. K' aléve-t-èle bèn polu fé avou lès fayêyes sipaurgnêyes mauyes dins s' si pitite boûse ?

Kwè avou Yèyète ? Di s' costé, k' avéve-t-èle chwèzi d' fé ? Èle si sovnéve bèn d' l' adrèsse dèl feume k' on lî avéve cauzé come boune assatcheuse d' ome. Dins s' grîje cote di l' intèrnat, avou s' pitit baluchon à s' brès, tote franche, èle a stî toker à s' n' uch.

L' Madame, ki s' loméve do Bouchnisse, lî a paujèrmint lèyî conter s' n' istwêre èt après d' lî dmander : "Kè n' âdje avoz ?"

- Bèn rade kénze ans, madame.
- Èt, vèyoz cki dj' vou dîre, vos n' vos avoz mauy lèyî "fé" ?
- Îe ! Maria Dèyi ! Non.na don, madame ! Dji vos l' djure !
- Mins, tévozé, dins cès maujhones la... on scoleû... ène bèguène... on confèsseu... ène camaraude... C'èst si rade arivé. Po vos crwêre, i m' fauréve dè preuves...
- I n'tént k' a vos d' taper on ouy !

Madame do Bouchnisse a mètu dè finès bèrikes à cwardon d' aur èt voye pa lèye minme ck' il è n' èstéve vrèmint...

- Vos n' m' avoz nèn minti. Vos ploz dmèrer vèci. I gn'a on réglumint à shûre. Dji m' va vos dîre kwè èt kèsse.

On comache todi...